

CONSTITUTION OF THE STATE OF NGEREMLENGUI

U C H E T E M E L A L L A C H
E R A
B E L U U E R A N G E R E M L E N G U I

ONGDIBEL ER A UCHETEMEL A LLACH ER A BELUU ER A NGEREMLENGUI
20 Ongelolem el Buil - 30 Ongeai el Buil, 1983
Ngeremlengui, Republic of Palau

BELDEKLEL A TEKOI

UCHELEL A BAKES

- I. KERENSEL ER A NGEREMLENGUI
- II. NGARUCHEI EL KLISIICH
- III. CHAD ER A NGEREMLENGUI
- IV. UCHETEMEL A LLEMALT
- V. ULDELID EL LLEMALT
- VI. NGERCHELEL A AMT ER A NGEREMLENGUI
- VII. LLECHUL A SENGKYO
- VIII. NGERCHELIR MA KLISIICHIR A RUBEKUL A NGEREMLENGUI
- IX. OLTAUT A LLACH
- X. OLBIIIL ERA NGEREMLENGUI
- XI. TEKOI ER A UDOUD
- XII. BEBIL ER A KERBIL A TEKOI
- XIII. OMELDECHEL A UCHETEMEL A LLACH
- XIV. KERBIL A OIUELEL A TEKOI ER A AMT

NGEREMLENGUI STATE CONSTITUTION

UCHELEL A BAKES

KEMAM A RECHAD ER A NGEREMLENGUI, A ULTUIL ER A KLAUMERANG ER KEMAM EL KMO A NGEREMLENGUI A IMOL BELUU, MAKI LMUUT EL MO SMISIICH E KMULL A DIMLA NGARNGII EL ULDELID EL LLEMELTAM MA KLISICHAM EL NGII A NGLAT ER KEMAM ER A RECHUODEL MEI, E DIRREK EL MO KULLII E SMISICHII A BECHES EL KELULUL A BELUMAM EL ULTUIL ER A MIMOKL E TABESUL EL OMERUUL EL MO ER A ROKUI EL CHAD. MA LEWAISEI E KEMAM A RECHAD ER A NGEREMLENGUI A OBA OMENGULL E DOLEMII E SMISICHII TIAL UCHETEMEL A LLACH EL MO MENERGBAI E MENGELUOLU A KELULUL A KLOBAK MA MIMOKL E TABESUL EL TELETELEL A AMT. MAKI MELATK EL MO KIEI EL NGARA BUDECH MA KLTARRENG LOKIU TIAL UCHETEMEL A LLACH EL ULTUIL ER A KLISICHAM MA LLEMELTAM MA ULEKERRUIL A RUBAK EL DIOS ER CHELECHANG EL MO CHERECHAR.

NGEREMLENGUI STATE CONSTITUTION

I. BLIONGEL

KERENGSEL ER A NGEREMLENGUI

A Beluu er a Ngeremlengui a oba deredel ma klisiich er a belual el luidimukl er a etemel ma debel ma melidiul ma berteklel ma chelmellel el mo lmuut er a 12 nautical miles er a ikrel a chelmoll era kerensel. A kerensel er a Ngeremlengui a omuchel er a mobedul a diluches el engii ma Ngardmau a kauliochel er a 12 nautical miles er a mobedul ngebard er a ikrel a chelmoll er a Medal a Chei er a Chetmadei e melemalt el mo bedul a dimesungos el mo er a Ulebuu el Yii, e mo risei e omdid er a taoch er a Ngermasech el mo er a Mekaud e melemolem el mo bedul ongos el mo er a Ngerchelchuus e mechesoim el mo bedul a diluchesungos el mo er a Ngkesiu e melemolem el mo kauliochel ngii ma Ngaraard er a Ngelsum, e ngarisei e mesim el mo bedul a dimes e melemolem el mo kauliochel ngii ma Ngiwal er a rois er a Ngel, e ngarisei e melemolem el mo er a Tbardrael el mo kauliochel ngii ma Melekeok er a Klaltbtaches e mechesoim el mo bedul a dimesngebard el mo er a Omsuulkebeas e melemolem el mo er a Ulong, e ngarisei el mo era Olouch e mechesoim el mo bedul a dimesungos e melemolem el mo era Omtochel el mo kauliochel ngii ma Ngchesar er a Ngerkeblol, e ngarisei e melemolem el mo bedul a dimesngebard el mo er a Olkael e melemolem el mo er a Esisekl e melemolem el mo er a Suskemedukl e di melemolem el mo kauliochel ngii ma Ngatpang er a Ngchelbakl, e ngarisei e mechesoim el mo bedul a diluchesngebard e melemolem el mo subechii er a Ollumel er a Rechieb e lmuut el melemolem el mo er a ked er a Ileakl e melemolem el mo er a Ngkebeduul, e ngarisei e omdid er a taoch el mo tuobed er a Ngerkall el omdid er a rael er a daob el bedul a dimesngebard el mo subechii er a Ngerbatmerang, e ngarisei e okiu a bkul a Malk el mo bedul a ngebard el mo okiu a delongelel a Omeduaol ma Telubeswaes el mo tuobed er a toi er a Termiid e mesim el mo bedul a dimesngebard el mo metengel er a tochelel a Uchulraksid e melemalt el mo bedul ngebard el mo er a Miich e mesim el mo bedul a diluches el mo er a rsel a Chelmoll er a Oikeam, e ngarisei e tuobed el mo bedul a ngebard el 12 nautical miles, e ngarisei e mesim el mo bedul a diluches e melemolem el 12 nautical miles er a ikrel a chelmoll el mo mak er a uchelel tial kerensel.

II. BLIONGEL

NGARUCHEI EL KLISIICH

Bades 1. Tial Uchetemel a Llach a kot el ngarbab el Llach er a Beluu er a Ngeremlengui.

Bades 2. A bekl llach ma bekl omerellel a Amt ma telbiil el ulsiseb er ngii a Amt er a Ngeremlengui a diak bo lomtök er tial Uchetemel a Llach, ea ikel mo kautök ngii me tiang a mo diak a klisichel er a di sel telkib el ngar ngii a klautök er ngii.

Bades 3. Ngii dil telkib er tial Uchetemel a Llach el mo kautök ngii ma Uchetemel a Llach ma llach er a Beluu er a Belau a mo diak a klisichel er a di sel telkib el ngar ngii a klautök er ngii.

III. BLIONGEL

CHAD ER A NGEREMLENGUI

A chad er a Ngeremlengui a bleketakl el chad er a Belau e chad er a Ngeremlengui lokiu a uldelid el llach ma lechub e nge llach.

VI. BLIONGEL

UCHETEMEL A LLEMALT

A rechad er a Beluu er a Ngeremlengui a ngarngii a mui el llemeltir el oltirakl a Uchetemel a llemalt el ulecholt er a Uchetemel a Llach er a Beluu er a Belau.

V. BLIONGEL

ULDELID EL LLEMALT

Bades 1. A Amt a diak el sebecel el olekebai ma lechub eng mesuld a omengull ma ngerchelel a klobak ma rulab a dereder el lokiu a kmal rolel el oltirakl a uldelid el llach. E dirrek el diak el sebecel a Amt el mo olekebai omengull el mor tir, ma techellir el mo ngmai a dui ma ngerachel er a ngii dil dauch er a Amt.

Bades 2. A llach ma uldelid el llach a di mo ta klisichel. Ea bol kautök ea llach a motirakl, engdi diak el bol temelii a uchetemel a uldelid el llach.

VI. BLIONGEL

NGERCHELEL A AMT ER A NGEREMLENGUI

A Amt er a Beluu er a Ngeremlengui a oltaut a ikal ludesuall e kedmekill el tekoi: omengeremelel a klebokel e ungil er a bedenged e kekeuii el chetemel ma debel ma eltel a beluu; odbechel a kerruul er a Beluu er a Ngeremlengui; klekerngir a rechad ma klokliir; ma odbechel a klisichel ma klungiolel a klengar ma delengchekliir a rechad er a Ngeremlengui.

VII. BLIONGEL

LLECHUL A SENGKYO

Bades 1. A chad er a Ngeremlengui el kesengil eng teruich ma eai (18) a rekil a sebechel el sengkyo er a ngii dil sengkyo er a Beluu er a Ngeremlengui. Ng diak a llach el mo melibas er tial llemalt.

Bades 2. A chad er a Belau el diak el chad ra Ngeremlengui e mla melemolem el kiei er a Ngeremlengui el kesengil eng ngelolem (6) el buil e rucheil er sel mor ngii el sengkyo a sebechel el mo sengkyo loltiraki a llach.

Bades 3. A Olbiil Era Ngaremlengui a mo olterkokl a llechul ma okedmeklel a babier er a rechad el kirel a sengkyo.

Bades 4. A chad el okiu a llach e ngar a kelebus ma lechub eng dirk melemolem er a belsel el kirel a klou el tellemall, ma mloterkokl er a kerrekeriil el kmo ngsmecher el kebelung, a diak el sebechel sengkyo. A sengkyo ra rechad a mo berrotel.

VIII. BLIONGEL

NGERCHELIR MA KLISICHIR A RUBEKUL A NGEREMLENGUI

Bades 1. A Rubekul a Ngeremlengui a:

(a) teuang (4) el Uong el kot el ngar bab el obekul a Ngeremlengui mar

(b) teuang (4) el btelul a belual Ngeremlengui.

NGEREMLENGUI STATE CONSTITUTION

Bades 2. A Rubekul a Ngeremlengui a di tir lomiich er a rechedal el oltiraki a uldelid el llach, engdi alsekum eng mor ngii a klautok el kirel a kingall e sel kingall a mo bechachau el di merekmo lemesmechoki loki u a uldelid el llach ma lechub eng llach.

Bades 3. A klisichir ma ngerchelir a Rubekul a Ngeremlengui a uleholt loyak a uldelid el kelulul a klobak el uldimuki er ngii a ikal belduki er iou:

(a) derderel a Beluu er a Ngeremlengui ioltiraki a uldelid el llach;

(b) ngeiul a uldesuir el kirel a uldasu el mo llach el melutk el kirel a uldelid el tekoi ma lechub eng uspechel a utem ma daob el kirel a meklou el ureor er uchei er a bol saing er ngii a Governor;

(c) kengei er a ongit er a rechad er a beluu el orrebet er a Governor ma rechedal Olbiil Era Ngeremlengui el lesaing er ngii a kesengil eng lluich-ma-eim el basent (25%) er a rechad el sebechir el sengkyo, a lengarngii a ungil luchul;

(d) omelutk er a tal mo Governor er a delongelel a erul (2) ngaki el bo lotobed a Olbiil Era Ngeremlengui alsekum ng mo diak a Governor loki u a ngii di luchul e ngesonges er a dart ma okai (180) el klebesei a medechel er a klisel tial kingall;

(e) osemecheklel a eliseksikt er a delongelir ar dertal chad al mongit; ma

(f) ngerachel el kirel a bebi er a tekoi el bo loholt a Amt er a Belau ma lechub eng Amt er a Ngeremlengui el okiu a llach.

Bades 4. A ududir a Rubekul a Ngeremlengui a mo metib loki u a llach.

IX. BLIONGEL

OLTAUT A LLACH

Bades 1. Ngikel oungerachel el oltaut a tekoi er a Amt er a Beluu er a Ngeremlengui a Governor.

Bades 2. Ngii dilchad er a Ngeremlengui el kesengil eng okedei (30) a rekil, e dirkak lobiich er a kerekereiil el mla tomelii a klou el tellemall ma lechub eng kekerongel er a

NGEREMLENGUI STATE CONSTITUTION

eungel a llach er sel taem er a sengkyo, e dirkak el mocholt er a kerekერიილ el kmo ngii a smecher el kebelung a sebechel el mo Governor.

Bades 3. A Governor a mo mengilt er a sengkyo er a rubdois el chad er a beluu el rokir e mo eua (4) el rak a rekil a urerel a tal lemengilt. A Governor a delengchelel a ngara Ngeremlengui.

Bades 4. Governor a mo olab a rokui el klisiich ma ngerachel el kirel a otutel a tekoi er a Amt el mo uldimukl er ngii a ikaikid:

- (a) mo oltaut a llach er a beluu;
- (b) mo melutk er a remo medal a meklou lureor lobengkel a uldesuel ma kengei er a Olbiil Era Ngeremlengui;
- (c) mo oltobed a udoud e mo melai a tax loltirakl a llach;
- (d) mo omtechei er a Amt er a Ngeremlengui er a bekl tekoi er eungel a llach;
- (e) mo meruul e oltobed er a yosang er a Amt er a Ngeremlengui er a bekl rak;
- (f) mo omtechei er a Amt er a Ngeremlengui el mengedecheduch a telbiil er a delongellel a Amt er a Belau ma Amt er a dertal beluu er Belau ma bebil er a chelchad el obengkel a uldesuel ma kengei er a Olbiil Era Ngeremlengui;
- (g) mo kongei ma lechub eng diak el kengei a uldasu el mo llach loltirakl er tial Uchetemel a Llach; e
- (h) mo sebechel e loltobed a uldasu el mo llach er a chelsel Olbiil Era Ngeremlengui.

Bades 5. A ududel a Governor ma ududir a remedal a meklou el ureor er a Amt a mo mekedmokl el okiu a llach.

Bades 6. A Governor a sebechel el mois er a kingellel a letemeli a klou el tellemall lomtok er a beluu ma lechub eng mecheluch er a udoud ma lechub eng ngii dil ngerang ma lechub eng tomeli a ngii dil ngodech el klou e oberaoed el tellemall el okiu a sengkyo el kesengil eng edei-er-euai tiud (3/4) er a rechedal a Olbiil Era Ngeremlengui el obengkel a uldesuir a Rubekul a Ngeremlengui.

NGEREMLENGUI STATE CONSTITUTION

Bades 7. A Governor a sebeche el morebet er a kingellel loku a sengkyo er a rubdois el chad er a beluu. A orbetel a Governor er a kingellel loku tial teletael a sebeche el meuchel el okiu a ongit el saing er ngii a kesengil eng lluch-ma-eim basent (25%) er a rechad el sebeche el sengkyo. Tial ongit a mo modurokl el mo er a Rubekul a Ngeremlengui. Alsekum a Rubekul a Ngeremlengui a kongei er ngii eng di chelsel odkedei (30) el klebesei eng mor ngii a sengkyo el orebet er a Governor er a kingellel. A Governor a mo rebet er a kingellel alsekum a rubdois el chad el mlo sengkyo a kilengei. A Governor a diak el sebeche el mo morebet er a kingellel ra chelsel a ikel kot el erung (2) el rak er a di sel kot el bol nguu a kingellel.

Bades 8. A bo lak a Governor loku a ngii dil uchul e obdois er a dart ma okai (180) el klebesei a medechel er a klisel er a kingall eng mor ngii a ileakl e sengkyo er a beluu el mo melilt er a mo Governor el mo merekui a ikel medechel el klisel tial kingall. Tial sengkyo a mo er ngii er a di chelsel okeua ma eim (45) el klebesei er a uriul er a bo lak a Governor.

Bades 9. A Governor a kirel kudmeklii a llechukl el chisel a urerel e chotebedii el mo er a Olbiil Era Ngeremlengui er a bekl rak.

X. BLIONGEL

OLBIIL ERA NGEREMLENGUI

Bades 1. A klisichel a omerellel a llach er a Beluu er a Ngeremlengui a ngara Olbiil Era Ngeremlengui el di imong (1) el blai.

Bades 2. A rechedal a Olbiil Era Ngeremlengui a mo mengilt er a sengkyo el uaikal ngariou e mo eua (4) rak a rekil a urerir:

(a) dertal mo mengilt el mo omtechei a dertal belual a Ngeremlengui; mar

(b) telolem (6) el mo mengilt er a Beluu er a Ngeremlengui er rokir.

Bades 3. A chad el sebeche el mengilt el mo er a Olbiil Era Ngeremlengui a kirel el:

(a) chad er a Ngeremlengui;

NGEREMLENGUI STATE CONSTITUTION

(b) kesengil eng lluich ma tang (21) a rekil;

(c) dirkak el obiich er a kerekereiil el tilmelii a klou el tellmall ma lechub eng kekerongel er a eungel a llach er sel taem er a sengkyo; e

(d) diak el lulecholt er a kerekereiil el kmo ng smecher el kebelung.

Bades 4. A Olbiil Era Ngeremlengui a olab a rokui el klisiich er a omerellel a llach el mo uidimukl er ngii a ikal beldukl er iou;

(a) mo meruul a llach er a tax;

(b) sebechelel el melsii ma lechub eng med a udoud el oba ngklel a Amt era Beluu el meruul a ureor ma lechub eng mengkad a belsel a buai el oltirakl a llach;

(c) mo mengeruakl a telbiil er a delongelel a Amt er a Belau ma Amt er a dertal beluu er Belau ma dertal chelchad loku a kengei er a rubdois el chedal a Olbiil Era Ngeremlengui;

(d) mo kongeie er tirkel metutk er a Governor el mo er a medal a meklou el ureor er a Amt el loku a sengkyo el kesengil eng eru-er-edei tiud (2/3) er a rechedal a Olbiil Era Ngeremlengui;

(e) mo oisur a Governor er a kingellel el okiu a sengkyo el kesengil eng edei-er-euai tiud (3/4) er a rechedal a Olbiil Era Ngeremlengui lobengkel a uldesuir a Rubekul a Ngeremlengui;

(f) mo mengedmokl el kirel a klungioliir a dertal chad ma budech ma ulekerreuil a beluu; e

(g) mo meruul a ngii dil ngodech el llach el kirel a klungiolel a buai er a Ngeremlengui.

Bades 5. A kingall er a Olbiil Era Ngeremlengui el mo teleu a mo siokel a chad el mo re ngii el mo merekui a ikel medechel el klisel loku a ileakl el sengkyo el mor ngii er a di chelsel okedei (30) el klebesei er uriul er a lebol teleu tial kingall. Alsekum eng ngesonges er a dart ma okai (180) el klebesei a medechel er a klisel a kingall, ea Rubekul a Ngeremlengui a mo tutkii a mo er ngii.

Bades 6. A ududir a rechad er a Olbiil Era Ngeremlengui a mo mekedmokl el okiu a llach. A rechad er a Olbiil Era Ngeremlengui a diak el sebechelel el di tir el rullii a llach el lolengesechekl a ududir er sel taem el ngara kingall.

NGEREMLENGUI STATE CONSTITUTION

Bades 7. A Olbiil Era Ngeremlengui a di mo ngii el tang a merritel er a mo chedal, e sebechel el sumcheklii ma lechub eng okiu a sengkyo el kesengil eng eru-er-edei tiud (2/3) er a rechedal e oisur a ta er a rechedal a le ngarngii a ungil el uchul.

Bades 8. A Olbiil Era Ngeremlengui a mo kldibel el kesengil eng eua (4) el taem er a tal rak el oltiraki a llach. Ng sebechel el mor ngii a ileaki el ongdibel er ngii er a ngii dil taem a lemokedong er a btelul a Olbiil Era Ngeremlengui, ma lechub eng mongit er a rubdois el chedal ma lechub eng mongit er a Governor.

Bades 9. Ng diak a chedal a Olbiil era Ngeremlengui el mo kerioli er a ngii dil ker el kirel a ngii dil tekingel ma cheldechedechal er a chelsel a ongdibel er a Olbiil Era Ngeremlengui. Sel taem el ngarngii a ongdibel er a Olbiil Era Ngeremlengui me sel taem el loraal el mo er a ongdibel ma luut er tir el mo remei, ea rechedal a Olbiil Era Ngeremlengui a diak el sebechir el mudechem el kirel a ngii dil temellel a llach, eng di ikakid a diak: klou el tellemali el ontok er a beluu ma lechub eng klou el temellel a llach ma lechub eng temellel a budech er a beluu.

Bades 10. A Olbiil Era Ngeremlengui a remuul a llechul ma kerbil a urerel el didk bol kautok ngii me tial Uchetemel a Lllach, e sebechel el oremelii a chedal el dibus meng mer ongdibel. A rubdois el chedal a Olbiil Era Ngeremlengui a bol kldibel eng sebechir el meruul a ureor, e dirrek el sebechir el oremelii a chad el me chocholt a uldesuel er a medal Olbiil era Ngeremlengui ma lechub eng Committee er ngii.

Bades 11. A Olbiil Era Ngeremlengui a mo ngiltii a mo btelul ma remo mengeteklel a urerel lokuu a kengei er a rubdois el chedal. A Olbiil Era Ngeremlengui a sebechel el mo osiik er a rechad el mo olengeseu el mengedmokl a urrerel.

Bades 12. A Olbiil era Ngeremlengui a diak el sebechel rulii a llach a lak lokuu a uldasu el mo llach. A ngiul a uldasu el mo llach a okiu a kengei er a rubdois er a rechedal a Olbiil era Ngeremlengui el ngara ongdibel. A teletelel ma ildisel omeliul a uldasu el mo llach ma ngii dil ngodech el tekoi a mo moterkokl el okiu a llach.

Bades 13. A uldasu el mo llach a lekengei er ngii a Olbiil Era Ngeremlengui eng mo modurokl el mo er a Governor, ea le saing er ngii eng mo llach. Alsekum a Governor a diak el saing er a uldasu el mo llach e ngoltii el mo er a Olbiil era Ngeremlengui er a di chelsel a teruich ma eim (15) el klebesei er a uriul er a le nguul lobengkel a llechukl el uchul eng mo diak el saing er ngii. A Governor a sebechel ngosengesii ma

lehub eng suldii a telengtengil a uldasu el mo llach el kirel a otebedel a uduoud, e saing er sel medechel meng mo llach, e oltii sel mlekesadel ma lehub eng sel milsuld el mo er a Olbiil Era Ngeremlengui er a di chelsel a teruich ma eim (15) el klebesei er a uriul er a le nguu lobengkel a lechukl el uchul; ma lehub e ngoltii tial uldasu el mo llach el mo er a Olbiil era Ngeremlengui lobengkel a ongti el kirel a omeldechel. A uldasu el mo llach a lak el saing ma lehub e lak loltii a Governor er a di chelsel a teruich ma eim (15) el klebesei er a uriul er a le nguu eng di ngii el mo llach. A uldasu el mo llach ma lehub eng telengtengil e dimlak el saing er ngii ma lehub eng ngilsengesii ma lehub eng sileldii a Governor a mo llach el oltirakl er sel dimla teletelel alsekum ma eru-er-edei tiud (2/3) er a rechadal a Olbiil era Ngeremlengui a kongei er ngii er a di chelsel a okedei (30) el klebesei er a uriul er a lemoluut.

Bades 14. A Olbiil Era Ngeremlengui a ngarngii a klisichel el orimel a omengitel a udoud el chilsimer a Governor, el ngii el udoud a mlo tobed lokiu a llach.

Bades 15. A chedal a Olbiil Era Ngeremlengui a sebechel el morebet er a kingellel el okiu a sengkyo er a rubdois el chad. A orbetel a chad er a kingellel el okiu tial teletael a sebechel el meuchel el okiu a ongit el lesaing er ngii a kesengil eng lluch ma eim el basent (25%) er a rechad er a belual el sengkyo e ulecholt a ngklir er a babier er a sengkyo. Qua tial ongit a kirel el mo meketeklii a uchul e ochotii a ngklel a chad e mo modurokl el mo er a Rubekul a Ngeremlengui. Alsekum ma Rubekul a Ngeremlengui a kongei er qua tial ongit eng di chelsel a okedei (30) el klebesei e ruriul eng mor ngii a sengkyo el kirel a orbetel a chad er a kingellel. Alsekum a rubdois el chad ei mlo sengkyo a kongei er a orbetel er a kingellel eng mo uaisei. A chad er a Olbiil Era Ngeremlengui a diak el sebechel el mo morebet er a kingellel er a chelsel a ikel kot el lerung (2) el rak er a di sel kot el bol nguu a kingellel.

XI. BLIONGEL

TEKUI ER A UDOUD

Bades 1. Ng mo er ngii a di tal omsangel er a Beluu er a Ngeremlengui. A rokui el udoud buai el soiseb lokiu a tax ma uldelid el llach ma kuk di ngodech el roel a mo mengai el mo er tial omsangel. Ng diak a ngii dil udoud el sebechel mo motobed er tial omsangel a lak loltirakl a llach.

Bades 2. A Amt er a Beluu er a Ngeremlengui a ngarngii a klisichel el oltobed a udoud el omekdubech a kerruul el oltiraki a llach.

XII. BLIONGEL

BEBIL ER A KERBIL A TEKOI

Bades 1. Tial Uchetemel a Llach er a Beluu er a Ngeremlengui a llechuki el tekoi er a Belau e uleiud el tekoi er a English. A tekoi er a Belau ma tekoi er a English a di mo ta klisichel; engdi a lebor ngii a klautok er a ikal lerul tekoi ea tekoi er a Belau a mo motiraki.

Bades 2. A rechad er a Ngeremlengui a sebechir remuul ma lechub e te smuld a llach er a Ngeremlengui el diak el uldimuki er ngii a llach er a otebedel a udoud, lokuu ongit. A oua tial ongit a kirel lulecholt er a chelsel a cherrengelel sel mo llach ma lechub eng cherrengelel sel llach el udesuall a seldel, e lluch ma eim el basent (25%) er tirkel ngarngii a ngklir er a babier er a sengkyo a liluches a ngklir er tial ongit. Oua tial ongit a mo er ngii a klisichel a le kengei er ngii a rubdois el chad el mlo sengkyo el kirel tial ongit er sel mei el sengkyo er a Ngeremlengui. A llach el mekedmoki ma lechub eng mesuld el okiu oua tial ongit a diak el sebechel el mo mutok er a Governor. A llach el mekedmoki ma lechub eng mesuld el okiu oua tial ongit a sebechel mo mengodech, mesuld ma lechub eng lmuut el mekedmoki el mo llach el okiu a kuk tara oua tial ongit el oltiraki er a teletael er a chelsel tial bades.

Bades 3. A belual a Ngeremlengui a ngarngii a Imeong, Ngermetengel, Ngchemsed, Ngerutechei ma Ngerekelngong. Ng diak a belual a Ngeremlengui el sebechel tuobed er a cherrengelel a Beluu er a Ngeremlengui.

Bades 4. A beluu el mo mukdubech er a chelsel a kerensel er a Ngeremlengui el okiu a beches el delengchoki a sebechel el mo er ngii a omtechei er ngii er a Olbiil Era Ngeremlengui. A Olbiil Era Ngeremlengui ma Rubekul a Ngeremlengui a mo oterkeklii a ungil lildois er a rechad er a chelsel sel beluu el le bo er ngii eng mo churengii omtechei er tir er a Olbiil era Ngeremlengui.

Bades 5. A beluu, chelmoli, ma kerker el doltiraki a cheldechuduch ma uldelid el llach eng mle klalo er a beluu er a Ngeremlengui a sebechel mengai el mo ulsiseb er a kerensel er a Ngeremlengui el okiu a uldelid ma lechub eng keldmoki el llach.

NGEREMLENGUI STATE CONSTITUTION

Bades 6. A omekodall el klalo loketa rua nuclear, dokungas ma lechub eng baiking el klekedall er a mekemad ma lechub eng nuclear power plant ma ikel cheiitel er ngii a diak bol subed a usbechel ma omelsemel ma okedmeklel ma omengitel er a chelsel a kerensel er a Beluu er a Ngeremlengui alsekum meng diak lekengei a kesengil eng edei-er-euai tiud (3/4) er a ildisir a rechad er a beluu er a Ngeremlengui el mlo sengkyo el kirel tial tekoi.

Bades 7. A Beluu er a Ngeremlengui a mengull e omdid a di mla deleuill er a irechar el mei er a delongelel ngii ma bebil er a beluu er a Belau.

XIII. BLIONGEL

OMELDECHEL A UCHETEMEL A LLACH

Bades 1. A omeldechel tial Uchetemel a Llach a sebechel el meuchel loki u a ongdibel el kirel a Uchetemel a Llach ma lechub ea rechad er a beluu a di tir el mechelii ongit el ua ikakid a blekerdelel:

(a) A kesengil eng bekl teruich ma eim (15) el rak, ea Olbiil Era Ngeremlengui a mo otebedii a ker el mora rechad er a beluu el sengkyo el kmo: "Ng mor ngii a ongdibel el mo mesmechokl ma lechub eng mo melodech er a Uchetemel a Llach?". Alsekum a rubdois el chad el mlo sengkyo el kirel tial ker a konge i eng mo er ngii a Ongdibel el kirel a Uchetemel a Llach er a di chelsel a elolem (6) el buil er a uriul er tial kengei el oltirakl er a blekeradel el kldmokl el okiu a llach; ma lechub eng

(b) Okiu a ongit el obengkel a saing er a kesengil eng lluch-ma-eim el basent (25%) er tirkel belsachel a ngklir el sebechir el sengkyo. Tial ongit a mo meketeklii a bades el udesuall a omeldechel e mo modurokl el mo er a Governor meng mo otebedii er a sengkyo.

Bades 2. Sel uldasu el mo melodech er a Uchetemel a Llach a mo tekoi a bol kengei er ngii ar kesengil eng okolem el basent (60%) er tirkel mlo sengkyo el chad el kirel tial uldasu er a chelsel sel mei el sengkyo er a Beluu er a Ngeremlengui.

XIV. BLIONGEL

KERBIL A OIUELEL A TEKOI ER A AMT

Bades 1. Tial Uchetemel a Llach a mo omuchel a klisichel er a elolem (6) el kebsengil a Kot el Buil er a 1984.

NGEREMLENGUI STATE CONSTITUTION

Bades 2. A ikel rokui el llach el ngarngii a klisichel e oureor er a chelsel a Beluu er a Ngeremlengui er uchei er sel sils el bol omuchel a klisichel tial Uchetemel a Llach a di melemolem el ngarngii a klisichel e oureor el di merekmo lemutechei, mesuld, mengai, mengodech ma lechub eng di ngii el mo diak a klisichel. A rokui el klisiich ma llemalt ma ngerachel ma judgments ma blals el mlukdubech el okiu a llach a di melemolem el ngarngii a klisichel.

AKI CHEMOLT ER A MEDEMIU, e kemam, el omtchei er a rechad er a Beluu er a ngeremlengui el meruul er tial el Uchetemel a Llach, el kldibel er a Bai er a Ngeremlengui er a Beluu er Belau er chelchl lluich ma etiu el kebesengil a Ongeiai el Buil er a rak ra Tal Telael ma Etiu el Dart ma Okai ma Edei, a mla lmuches a ngklam er tiang,

ADVISORS

/s/Ngirturong Laurence
Ngirturong Laurence

Ngiradilubech Thomas

/s/Ngiraklang Malsol
Ngiraklang Malsol

Beches Maidesil

/s/Ngirutelchii Ngirngeschei
Ngirutelchii Ngirngeschei

Uchelrutechei Kingya

/s/Nqirasibong Fritz
Ngirasibong Fritz

Adelbeluu Delbirt

DELEGATES

Masami Elbelau

Masuo Kyota

NGEREMLENGUI STATE CONSTITUTION

Shiro Kyota

Adelina Isechal

Alonzo Tellei

Ayano Baules

Baurino Oingerang

Francis Toribiong

Herbert Fritz

Hersey Kyota

John Sugiyama

Madlutk Ibutirang

Melemalt Remasch

Moses Mekoll

Ngirabersoech Ngirengkoi

Ngirngotel Idesmang

Tommy Remengesau, Jr.

OMELISIICH: _____

Barmelio Ibutirang,
Convention Secretary